

REGIONAL NEWS

HEADLINES:-

1. Chief Minister Pu Lalduhoma'n BSF hna lak kal mek ngaihven turin Mizo tlangval te a sawm.
2. Sorkar laipuiin GST rate thar a duan chuan bungraw thenkhat man tlawm chauh pawhin mipuite nasa takin a chhawk zangkhai dawn tih bungraw zuartute'n an sawi.
3. Aizawl leh Silchar inkara Sairang leh Kawnpui inkar kawng chhe zual siam that tawh a chhiat leh nasat tawh avangin lirthei tangkhang a tam leh tawh hle.
4. Prime Minister Narendra Modi-a'n sakhaw hunpui lo thleng tur lawmnaah ramchhung thil siam chhuahte hmang uar turin mipui a ngen.

<><><>

CM - BSF

Chief Minister Pu Lalduhoma'n BSF hna lak kal mek ngaihven turin Mizo tlangval te a sawm.

Social media kaltlangin he thu hi sawiin Chief Minister chuan BSF recruitment kalpui mek chu Mizo thalaiten beisei angin an bengkhawn tawh lo hle a a hriat thu leh pawh a tih thu a sawi a. Ramri veng tur, ram tana ngaihtuahna seng mi, ram hmangaih mi an luhna atana an duh a nih thu sawiin recruitment chu kalpui mek a la nih avangin Mizo tlangval te chu he hun remchang hi hmang tangkai tura a duh thu a sawi a ni.

Chief Minister chuan Mizo hlang battalion, Territorial Army neih a nih dawn thu leh recruitment pawh tih tep a nih thu a sawi a. Aizawl leh Lunglei recruitment huaihawt turin company khat ve ve an rawn luh tawh thu sawiin Champhaiah company khat awmna tur ngaihtuah leh mek ani ati a, Territorial Army atan hian a tirah battalion din nghal thut theih a nih loh thu leh a tirah mi 150 lak phawt an nih dawn thu leh hemi hnuah hian hmeichhe tan pawh an la dil zui zel dawn thu a sawi a ni.

Chief Minister chuan Territorial Army chu battalion puitling la ni chho tur, an awmna hmun nget tur pawh la ngaihtuah zel tur a nih thu te, ramri hrula duty tur, thu pawimawh te lakhawma sorkar mit leh beng ber tur an nih thu leh an pawimawh thu a sawi a. Thalai tha tak tak thawk thei tur an awm tih a hriat thu leh thahnemngai taka ngaihven ngei tura a duh thu a sawi a ni.

Hetih lai hian Lunglei a kan Corr sawi danin Lunglei a Lena stadium-a Lunglei, Lawngtlai, Siaha leh Hnahthial District atanga BSF lakna a inlan tuma inziaklut hi an tam lo hle a. October ni 9 nghak thleng lovin ni 3 thleng taksa endik kalpui a ni dawn a. Diltu zingah hian Mizo an awm na a hnam tlem zawk, a bikin Chakma thalaite diltu an tam hle a ni.

<><><>

MANPOWER SHORTAGE

Mamit district Chief Medical Officer (CMO) pisa huam chhungah hriselna lam a hnathawktu Health Worker indaihlohna a nasa hle a, Mamit district a Health Sub Centre 6 ah leh Health Clinic centre 1 ah te chuan thawktu health worker pakhat mah an awm lo.

Akashvani corr sawi danin Health Sub Centre ah te hian a lo berah thawktu Health Worker mipa leh hmeichhia an awm tur a nih laiin Mamit district chhung khaw hrang hrang Health Sub Centre awmna khaw 6 - Darlak, Marpara, Parvatui, Saikhawthlir, New Eden leh Silsuri khuaah te leh Health Clinic centre Rajiv Nagar khuaah te chuan thawktu health worker an awmlo a. Mamit district chhungah hian Health Sub Centre 39 awmin chung zinga 6 ah chuan thawktu an awm lo a, Health Sub Centre 12 ah te Health Worker mipa an awm lova, Hmeichhe Health Worker awm lohna Sub Centre 9 a awm bawk.

Mamit district chhungah hian Health worker indaih lohna hi a nasa em em a, Health Sub Centre bakah Health Clinic centre leh Health & Wellness centre ah te pawh health worker awm lohna a awm a ni.

<><><>

GST 2.0

Sorkar laipuiin GST rate thar a duan chuan insakna bungraw tam zawkah nghawng lo mahse bungraw thenkhat man tlawm chauh pawhin mipuite nasa takin a chhawk zangkhai dawn tih bungraw zuartuten an sawi.

Insakna bungraw hrang hrang zuartute chuan Akashvani zawhna chhangin an bungrua tam zawk chu GST rate thar in a nghawng loh, a man ngai anga la hralh tur a nih thu an sawi a. A hmaa GST zaa 18 chu bungrua zaa 90 chuangah zaa 18 a la nih chhonzawm zel thu an sawi a. Bungraw thenkhat, natural stone - granite leh marble a hmaa zaa 18 ni thin zaa 5 ah a tlakhniam thu leh thing tak hmanga siam furniture hrang hrang man pawh a tlakhniam thu an sawi a. Choka siamna bungraw thenkhat man a tlakhniam thu an sawi bawk.

Insakna bungrua zingah cement man, tlema a tlakhniam thu bungraw zuartute chuan an sawi a. Steel rod-ah chuan danglamna a awm lo tih sawiin balu leh brick-ah pawh danglamna a awm lem loh an ti ani. Electric bungrua zuartute pawhin bungraw man tlawm a awm nual dawn thu an sawi a, a tlangpuiin an bungraw man danglam dawn lo mahse a bungraw thenkhat tlawm ringawt avang pawhin mipuite sum sen tur tam tak a hniam phah dawn tho tih an sawi a ni.

<><><>

TOURISM

Tourism Minister Pu Lalnghinglova Hmar chuan Mizoram tlawhtu an pun nasat thu sawiin hei hian Mizoram ei leh bar dinhmunah a tha zawngin nghawng a nei chho zel dawn a ti.

Nizana Ignite Studio, Aizawla LESDE UPSC Challenge Inter College Quiz Competition 2025 kharna hun a hmanpuinaah he thu hi sawiin Minister chuan kum 2023-2024 chhungin Mizoram tlawhtu mi nuai 2 sing 1 sang 9, 114 an nih thu leh kum 2024-2025-ah chuan mi nuai 5 sing 2 sang 4, 784 an nih thu a sawi a. A punna hi mi nuai 3 sang 5, 670 a nih thu leh hei hi za zela chhut chuan 139.5 in an pun thu a sawi a. A chhan tam tak zinga pakhat phat rual loh chu Manipur buai avanga lut chhuak an tam vang a nih thu a sawi a. Chumi piah lamah Mizoram tlawhtu nasa takin

an pung a, Mizoram ei leh bar dinhmunah a tha zawngin nghawng a nei chho zel dawn a ni a ti.

Tourism lamah hma sawn zel an tum tih sawiin Minister chuan tunah hian an sorkar hnuah project hrang hrang, cheng nuai 'singthum sangnga zasarih sawmkua pariat point pahnih pahnih' project an nei a ti a ,an thawh mek leh thawh chhoh tur, sorkar laipui atanga an dawn deuh vek a ti. Tourism-a awmze nei lehzuala kal a nih theih nan kum 2026 atangin tourist calendar neih ni se tih an rel thu leh Mizoram tlawh tum ten eng nge kum khat chhungin eng ang hun hrang hrang nge huaihawt a nih dawn tih an hriat lawk theihna tur a nih thu a sawibawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

HIGHWAY

Aizawl leh Silchar inkar kawngpui, a bikin Sairang leh Kawnpui inkar kawng chhe zual siam that tawh a chhiat leh nasat avangin lirthei tangkhang a tam leh tawh hle.

Tukin dar 8 leh a chanve atanga a let zawnga chhuta darkar 24 chhung khan Kawnpui atangin bungraw hrang hrang phur lirthei 585 chhuah a ni a. Lirthei ruak, Sairang peng leh Mualkhang/Khamrang inkara tangkhang Assam lam pan tur pakhat mah chhuah a awm lova, Hemi hun chhung hian Khamrang a Assam lam pan truck ruak 426 chu an tangkhang mek a, Kawnpui a Aizawl lam pan bungraw phur tangkhang erawh a awm lo thung. Thu dawn danin Sairang leh Kawnpui inkar kawng siam that hi a chhiat leh nasat tawh em avangin kawng a nal em em a, truck ruak a kal hlei thei lova, tlu leh tang an tam thei hle a ni.

He tih lai hian Dampa assembly bial hun laklawha inthlan lo awm tur atana beihpui thlak mek, MNF candidate Dr. R. Lalthangliana chuan ZPM sorkar hnuaia Sairang - Kawnpui inkar kawng chhe lutuk bakah, Zoram hmun hrang hranga kawng chhe lutuk chu a vei thu sawiin, hemi siamna tura ZPM sorkarin 'Road Maintenance Cess' a lak chu khawiah nge a awm tih sorkar a zawt a. Sorkar chu nawrh leh phut kher ngai lovin kawng siamtha turin a ngen tih MNF thuchhuah chuan a tarlang.

Dr. R. Lalthangliana chuan nikum September atang khan sorkar kal tawhte tih ve ngai loh, petrol leh diesel litre 1 zelah cess chi hnih - khawtlang mamawh hmasawna dinna tur (social infrastructure cess) cheng 2 leh kawng siamna tur chhiah (road maintenance cess) atan cheng 2, a vaiin litre 1-ah cheng 4 a la tih sawiin mipuiin a hmanna an hre lo niin a sawi a. Chhiah lak tlingkhawm hi cheng vaibelchhe 51 chuang daih tawh ni a a hriat thu leh tunah phei chuan a tam belh tawh hial a a rin thu a sawi a. Kawngpui enkawl na atana chhiah chi khat 'Cess' a lak tlingkhawm chauh pawh cheng vaibelchhe 25 chuang a ni daih tawh a, a rin thu a sawi a ni. He ti chung a he lai kawnga lirthei kal thi neitu leh khalhtute'n kawng chhe lutuk avanga nawrh huaihawta sorkar an vau reng mai leh minister leh MLA rualin an vil chung pawha thla khat bak daih lo khawpa siam a ni chu mipui laka hmai phih fai tumna mai ni a a ngaih thu a sawi bawk.

MANN KI BAAT

Prime Minister Narendra Modi-a'n sakhaw hunpui lo thleng tur lawmnaah ramchhung thil siam chhuah hmang uar turin mipui a ngen. Vawiin Akashvani-a Mann Ki Baat hun a hmannaah he thu hi sawiin Pu Modi-a chuan sakhaw kut pawimawh hman tur a indawt chho thluah dawn a, hetiang boruak karah hian GST Bachat Utsav pawh hman mek a ni, a ti a, mipuite chu ramchhunga thil siamchhuahte chauh hmang tura intiam turin a ngen a, kut lawm chhung hian chenna in chauh tifai lovin khawlai, bazar leh thingtlangah te pawh faina kalpui a pawimawh a ni, a ti.

<><><>